

Стихиры свт. Василия Великого на хвалитех, глас 5:

Хвалите Бога во святых Его, // хвалите Его во утверждении силы Его.

По благодати Сын Божий быв / возродением Божественного крещения, / естеством и истиною, / и первовечна Сына Божия и Слова, / Единосушна Отцу и Собезначальна / исповедал еси преподобне, / еретиков же незатворенная уста / светлостию твоих словес заградил еси. / Темже и в Царства Вышняя вселился еси, / сцарствуяй Единому / и естественне Царствующему Христу, // богато раздающему миру велию милость.

Хвалите Его на силах Его, // хвалите Его по множеству величества Его.

Внутрь Небеснаго храма / яко святитель священен вместился еси, / деянием и видением / премудрости началами, / яко одеждою святою, обложен. / И ныне в Вышнем жертвеннице, преподобне, священствуя, / и Богу предстоя, и невестественную службу совершая, / поминай милостивно, всеблаженне Василие, / совершающая память священную твою и всечестную, // Христа моля, подающего миру велию милость.

Хвалите Его во гласе трубнем, // хвалите Его во псалтири и гуслех.

Весь освящен Богу / и всеобразно от детства возложен, / Мудрости Пребожественныя озарився зарями, / сущих разумение уяснил еси, / светло сказуя и мудре поведая, / еже в сущих благочиние творя / познания Божественнейшаго дела. / Темже Тя, Богоглаголива и Божественна учителя / и светоносна светильника церковнаго, проповедуем, / Христа моляща, // подающего миру велию милость.

Хвалите Его в тимпане и лице, // хвалите Его во струнах и органе.

Хвалите Его в кимвалех dobroгласных, хвалите Его в кимвалех восклицания. // Всякое дыхание да хвалит Господа.

Страхом утвердився Божиим, / начало Премудрости разумел еси, Василие, / страх премудростию и жития правостию / превозшел еси, отче, / любовь же Богу срастворився, / и свойственнейший был еси. / Темже Божественным наказався оправданием и судьбам, / человекoв изучил еси обычаи / и украсил еси верных разумы, / законоположеньми духовными уяснив собор. / Христа убо моли // душам нашим даровати велию милость.

Слава, глас 6:

Излияся благодать во устнах твоих, преподобне отче, / и был еси пастырь Христовы Церкви, / уча словесныя овцы / веровати в Троицу Единосушную // во Едином Божестве

И ныне, глас 8 - й:

Сходяй Спас к роду человеческому / прият пеленами повитие, / не возгнушася плотскаго обрезания, / осмодневен по Матери, Безначальный по Отцу, / Тому, вернии, возопиим: // Ты еси Бог наш, помилуй нас.